

Apeqquteqaat aallaavigalugu oqallisissiaq: Sulinermi akileraarutitigut saniatigut isertitat akileraarutitaasa apparsaavigisinnaanerannut inatsisartut qanoq isumaqarpat?
(Inatsisartunut ilaasortaq Jakob Skade, Kattusseqatigiit Partiiat)

Akissuteqaat

(Aningaasaqarnermut Naalakkersuisoq)

Inatsisartunut ilaasortaq Jakob Skade, Kattusseqatigiit Partiiat, apeqquteqaat aallaavigalugu oqallinnissamut siunnersuutaanut qulaani taaneqartumut qutsavigaara, taannalu oqaaseqarfigerusuppara makkuninnga.

Apeqquteqaat aallaavigalugu oqallinnissamut tunngavissiami siunnersuutit ilaatigut makku ilaapput:

Soorlu assersuut, akileraarut 42%-iusimappat, saniatigut isertitat toqqaannartumik 42%-imik ilanngarnagit appasinnerusumilli akileraarusertalernissaa, soorlu 30%-imut appartinneqarsinnaanera inatsisartut qanoq isumaqarfigivaat?

Tassunga tunngavilersuutaavoq:

- *Inuit sulerusussusermik pigisaqartut aamma ajunnginnerusumik pineqarnissaat sulinernullu suli pitsaanerusumik kajumissuseqarnissaat pissusissamisoormat.*

Ajornartorsiut siunnersuummi allaaserineqartoq oqaluuserissallugu naleqquttuusoq Naalakkersuisut isumaqarput, tassa inuussutissarsiummik namminersorlutik ingerlataqartut qanoq iliorluni inuiaqatigiinnit pitsaanerpaanik atugassaqartitaasariaqarnerat pillugu apeqqutip oqaluuserineqarnissaanik siunniussiviummat.

Namminersortup suliffeqarfiutaata ingerlatseqatigiiffittut imaluunniit inuinnartut ingerlanneqarnera aallaavigalugu akileraarusiisarnerup soq assigiinngissuteqartariaqarnera pillugu apeqqut siunnersuutikkut aamma sammineqarpoq.

Allanilli aamma ajornartorsiuteqarpoq, tassa akileraarusiisarnermi innuttaasut assigiimmik pineqarnissaat aallaaviusariaqarmat, tassami namminersorluni suliffiutigisamik nammineq ingerlataqarnikkut isertitat isertitanit akissarsiortutut isertitaasuniit, taakku amerlaqatigiikkaluartut, sakkortunerusumik akileraaruserneqarnissaat silatusaarnerunngimmat.

Apeqqutit akissutisariaqartut akileraarusiinermit tunngaviusunik allaaserinnittut, tassa imaappoq inuiaqatigiit ingerlanneqarnerannut aningaasat atugassat suminngaanniit qanorlu

amerlatigisut akilersinniarneqassanersut, Akileraartarnermut Atugarissaarnermullu
Isumalioqatigiissitamut suliakkiutini ilaapput.

Taamaattumik tungavissaasumik pingaarutilimmillu oqaluuserinnittussanngorpugut,
taamaattumik isumassarsiat ilanngussassallu Inatsisartunut ilaasortanit
saqqummiunneqartussat qilanaaraakka – oqallilluarnissassinnik kissaappassi.